

Ittoqqortoormiini umiarsualivissamik nutaamik Naalakkersuisut sanaartornissamut pilersaarusiornissamut (projektering) peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mette Arqe-Hammeken, Naleraq)

Siullermeerneqarnera

Qujanaq siulittaasoq.

Siullermik qujanaq siunnersuuteqartumut, Inatsisartunut ilaasortaq Mette Arqe Hammeken Naleqqameersumut, Ittoqqortoormiini umiarsualivimmik pisariaqartitsineq pillugu siunnersuummik pingaarutilimmik saqqummiussineranut. Naleqqamiit ersarissumik oqaatigissavarput: Ittoqqortoormiit tassaavoq nuna tamakkerlugu ataatsimoorussatsinni pingaarutilik, oqaluttuarisaanitsinni nunatta kangia pilerngunneqaruttormat Norskellu qallunaalu unammissutigini kuusaat, taamaammat Ittoqqortoormiit innuttalerneqarnikuuvoq 1925-mi Tasiilap eqqaaniit, kiisalu kitaaniit innuttalerlugu.

Ittoqqortoormiit ukiuni sivisuuni unamilligassartaqarsimavoq: tikiqqarsinnaaneq killeqartoq, inuussutissarsiornikkut periarfissat annikinnerusut, aammalu angallannikkut ataqtigiinneq amigaataasoq immakkuuppat, silaannakkuuppalluunniit.

Taamaattumik siunnersuut manna atuisussanik pisariaqartitsinernillu sukumiisumik sanaartortoqarnissaanut siunnersuuteqartoqarnera Naleqqamiit taperserparput, tassami innuttaasut Ittoqqortoormiini aamma nunatta sinneraniittut assigiimmik periarfissaqartinneqarnissaat pingaaruteqarmat, assigiimmik ineriartortitsisoqassappat pisariaqarpoq aamma Ittoqqortoormiit pilersitiviginissaa.

Umiarsualivik nutaaq tassaassooq inuussutissarsiutit nutaat pilersinneqarsinnaangortussat, inuussutissarsiornikkut periarfissat annertunerusut ingerlateqqinneqarsinnaapput nangittumik, aammalu innuttaasut inuunerannut pitsaanerumik sinaakkutit, suliffissallu nutaat pilersinneqassapput.

Naleqqamiit neriutigaarput talittarfiliorneq ilutigalugu umiatsianut ungalusamik umiatsiliveqarsinnaanerat ilanngullugu pilersaaruisiornermi ilanngutaqarlutik suliaqartoqassasoq, nammineq tikillugu najornikuugakku nalunnginnakku imarpimmut ammaannarnera annertuumik immap aalasanera annertuumik umiatsiliveqarnikkut ilungersunartorujussuummat.

Taamaattumik Naleqqamiit oqaatigissavarput: Ittoqqortoormiit ineriartortinneqassaaq nunap sinneratuut pisinnaatitaalluni, aammalu innuttaasut sumiiffinni avinngarusimasuniittut salliutinneqassasut Naleqqamiit anguniararisarlugulu isumaqarpugut.

Sineriammi sumiiffiit allat aamma unammilligassartaqartut eqqaamavagut, kisianni Ittoqqortoormiit nunatta sinneratuut pingaartinneqarnissaa pingaartipparput, taamaattumillu Naleqqamiit pingaartipparput tulleriaarinermi siulliit ilaatinneqalissasoq, piviusorsiorpalaarnerusumik pilersaaruisiorneq Ittoqqortoormiinumut pisariaqalerpoq, mittarfittaarnissaq pisariaqartinneqarpat aamma talittarfik pisariaqavippoq.

Taakkua ataqatigiisillugit suliarineqartariaqarput. Suliat imminnut ataqatigiisillugit. Mittarfik taavalu talittarfik sulisinnaasut Ittoqqortoormiiniinnerini, qallunaat politikeriilu suliaq aallartinneqalereersoq atsiorneqareerput 1,6 milliardit iluatsillugit atorluarlugit sanaartornerit ataatsimut ingerlanneqarnissai Naleqqamiit siunnersuutigaarput.

Naluneqanngitsutummi Ittoqqortoormiini mittarfiliornissaq Naalakkersuisut siulittaasuaniit kiisalu qallunaat Ministariunerata isumaqatigiissutiginikuuat atsiorlugu Ittoqqortoormiini mittarfiliortoqassasoq. Taamaammattalittarfik sanaartornissamut qamuterujussuarnullu assaasussat nunaminertanut ikaartinneqartussaapput, sanaartornermili qallunaatut taallugu (Byggematerialer) usingiarneqartussaapput. Massakut talittarfiup tamakkua tamaasa nammassinnaanngilai.



Uggoraarpullu uuma siunnersuutip allatuut misissuinerit inissinniarneqarnera. Misissuinerpassuit aningaasarpassuarnik naleqartarmata. Oqanngilagut misissuinerit pisariaqanngitsut. Tassani Naalakkersuisut Atassullu misissuinissaq aalajangiusimammassuk uggornarpoq.

Soorunami pisariaqavissuni misissuinerit soorunami ingerlanneqarsinnaapput. Nunaminertap sumiissinnaanerini. Immap itissusaa. Talittarfiliassallu qanoq oqimaatigisunik tulaassuiffigineqartarnissaa.

Kiisalu nuna allanngortittariaqaligassaq qanganisarsiuunik misissuiffigineqartariaqassooq nalunaarsuillunilu siuligut tassani susarsimanagerinik, sunik pisaqartarsimanagerinik, soorlu sanaartorfigineqartartut allat taamaalineqartartut.

Allallu susassaqtartut pisariaqavissut misissoqaarneqassapput soorunami.

Takornariaqarneq nukittunerulissappat mittarfissarlu talittarfissarlu tikiffittullu aallarfiissatut imminnut ataqatigiittariaqarput. Taavalu saniatigut suliffiit nutaat pilertussaassapput inunnut amerlanernut. Taavalu ilinniartitaanerit mittarfimmiuppat talittarfimmiuppalluunniit pisinnaalissapput suli annertunerulerluni.

Taamatut oqaaseqarluta siunnersuuteqartup siunnersuutaa taparserneqassasoq inassutigaarput, ataatsimiisitaliamili eqqartorluarneqaaqqarluni ingerlaqqinnissaanut Naleqqamiit tapersersuilluta innersuussutigaarput.